

**MESYUARAT PERTAMA PENGGAL KEDUA
DEWAN UNDANGAN NEGERI PULAU PINANG
YANG KELIMA BELAS
24 MEI 2024**

PERKARA : 5(B)12

**SOALAN LISAN OLEH AHLI KAWASAN AIR PUTIH
YB LIM GUAN ENG**

12. Nyatakan kos Program Madani Rakyat 2024 Zon Utara di Tapak Pesta Sungai Nibong dan kos yang ditanggung oleh Kerajaan Negeri, nama syarikat yang diberikan kontrak dan adakah syarikat ini berasal dari Pulau Pinang dan kalau tidak mengapa?

JAWAPAN OLEH YAB KETUA MENTERI

12. (a) Berdasarkan Keputusan Jemaah Menteri berhubung penganjuran Program MADANI Rakyat 2024 semasa mesyuarat pada 7 Februari 2024 telah bersetuju agar Program MADANI Rakyat ini diperluaskan kepada beberapa zon di negeri dalam Malaysia yang terpilih dalam memberi peluang kepada masyarakat setempat untuk lebih memahami dan menilai dasar serta inisiatif baharu dilaksanakan Kerajaan MADANI dalam usaha meningkatkan kesejahteraan hidup rakyat. Melalui **Mesyuarat Penyelarasan Penganjuran Program MADANI Rakyat 2024 Bilangan 1 Tahun 2024 bertarikh 29 Februari 2024** telah menetapkan Negeri Pulau

Pinang sebagai tuan rumah bagi penganjuran program Zon Utara, mewakili negeri Pulau Pinang, Kedah dan Perlis. **Kerajaan Pulau Pinang** bersama **Kementerian Pengangkutan Malaysia (MOT) (Kementerian Peneraju)** telah menganjurkan Program MADANI Rakyat Zon Utara pada 3 hingga 5 Mei 2024 (8 pagi – 10 malam) bertempat di Tapak Pesta Sungai Nibong, Pulau Pinang. Tapak Pesta Pulau Pinang merupakan lokasi program yang telah dipilih memandangkan ketersediaan tapak yang lengkap bersama kemudahan infrastruktur yang diperlukan bagi memastikan perbelanjaan program tidak melangkaui peruntukan yang ditetapkan.

Untuk makluman, sebanyak 196 perkhidmatan kementerian dan agensi kerajaan telah bekerjasama di dalam program ini dimana ini merupakan satu program berskala kebangsaan. Justeru, jumlah siling peruntukan bagi pelaksanaan Program MADANI Rakyat ini adalah sebanyak RM3.2 juta dimana kos ini akan **menggunakan peruntukan Kerajaan Negeri (tuan rumah)** melalui **perkongsian kos bersama Kementerian Peneraju (Kementerian Pengangkutan)**.

Untuk makluman, Mesyuarat Majlis Kerajaan Negeri Bil. 10/2024 telah membentangkan dan meluluskan pelaksanaan Program MADANI Rakyat 2024 Zon Utara dengan siling peruntukan sebanyak RM2,000,000.00. Dimaklumkan juga, perbelanjaan keseluruhan yang dikongsi bersama (Kerajaan Negeri Pulau Pinang & MOT) iaitu sebanyak RM3,7003,316.48, manakala terdapat kos asing yang ditanggung oleh Kerajaan Negeri Pulau Pinang bagi membiayai aktiviti/program Kerajaan Negeri Pulau Pinang seperti aktiviti sukan dan forum agama yang dianjurkan oleh kerajaan negeri adalah sebanyak RM127,004.84. Sehubungan itu, kos peruntukan keseluruhan yang dibelanjakan oleh Kerajaan Negeri Pulau Pinang untuk program ini adalah sebanyak RM1,977,163.08 dengan penjimatan sebanyak RM22,836.92 melalui pelaksanaan program ini.

- (b) Nama syarikat : Chilli Hotshoes Asia Sdn. Bhd.

- (c) Syarikat terpilih mempunyai alamat berdaftar di Petaling Jaya, Selangor. Pemilihan syarikat ini telah dibuat selaras dengan tatacara kewangan dan perolehan berkaitan selepas keempat-

empat syarikat (2 syarikat tempatan & 2 syarikat luar Pulau Pinang) melaksanakan pembentangan masing-masing.

Pemilihan Syarikat Chilli Hotshoes Asia Sdn. Bhd. adalah berdasarkan faktor-faktor berikut:

- (i) kos yang ditawarkan berpatutan, dalam lingkungan bajet yang diluluskan MMK dan paling menguntungkan Kerajaan;
- (ii) mempunyai pengalaman setara dalam penganjuran majlis / program rasmi Kerajaan yang berstatus kebangsaan;
- (iii) konsep program yang dibentang dan dicadangkan adalah menetapi keperluan / kehendak jabatan penganjur (MOT & Kerajaan Negeri);
- (iv) kesuntukan masa persediaan program yang memerlukan pelantikan segera syarikat pengurus acara (*event manager*) dilaksanakan.

Untuk makluman jua, kriteria utama yang ditetapkan dalam pemilihan syarikat adalah syarikat yang terpilih haruslah

memastikan sekurang-kurangnya menggunakan 50% perkhidmatan daripada vendor tempatan (dalam negeri Pulau Pinang) agar perkembangan dalam pasaran kewangan negeri Pulau Pinang dapat dirasai. Dan semakan terkini mendapati syarikat Chilli Hotshoes Asia Sdn. Bhd. telahpun mendapatkan perkhidmatan vendor tempatan (dalam negeri Pulau Pinang) sebanyak 60% untuk perkhidmatan utama seperti perkhidmatan percetakan, perkhidmatan fabrikasi reruai agensi/kerajaan, perkhidmatan vendor peniaga jualan makanan dan beberapa perkhidmatan yang berkaitan.